



*"Mir sinn eng kleng
Oppositioun",
seet de Giordano
Bruno iwwert den
Underground-Label
Winged Skull.*

ren ze fannen. Déi Suën déi erakommen, an et kommen der wierklech net vill eran, ginn haaptsächlech drop fir eis Käschtchen déi mir hunn a fir d'CD'en regelméisseg ze verschécken an un eis Concert'en déi mir organiséieren. Mir sinn nach net un dem Punkt wou mir d'Gruppen kënnen räich man, do bräichte mir méi Ennerstëtzung vun de Medien, Concert's Säll, etc. Eis Gruppen di sech schwéier fir iwwerhaupt kënnen éierewou op uerdentleche Plazen ze spillen ausser a Café'en, obwuel si wierklech net vill froen, si wëlle just spillen. Eis Gagen leien tëscht 100-200 €, an net 5000-15000 €, wéi verschidden international Gruppen.

Wat misst sech kulturpolitesch ännere fir dass d'Musikszene sech besser kinnt entwéckelen?

Also ech brauch ee Sall, maximal Kapazität 300 Lait fir meng kleng Concert'en, wou ech keng Schwierigkeete kréie mat der Police oder den Nopere. Ech wëll just Musek maachen, ech brauch dat wierklech, ech brauch keng Coque oder Rockhal, alles onnéideg an aus der Fënster erausgehéiert Geld!

Ech wënsche mir méi Respekt fir dat wat mir maachen. Wat ech domatt wëll soen ass, dass et net an der Rei ass dass d'Autoritéiten eis d'Concert'en heiansdo einfach esou ofbriechen. Dat ass a mengen Aan respektlos, mee et ass nummol esou wann d'Musek e bësse méi haart ass ...

Géingt dir dann awer net, wann dir lo méi Ennerstëtzung giff kréien, den alternativen Aspekt verléieren an och Deel vum Establishment ginn?

Jo, dat stëmmt schonn, mee firwat geet et dann a Frankräich, England, an den USA, etc ... a bei eis net? A Frankräich gëtt et eng art Chômage culturel fir d'Gruppen. An Italien ginn et iwwerall équipéiert Proufsäll fir 5 € - 10 € d'Prouf ... mir bezuelen bis zu 300 € de Proufsäll. Ech fannen et geet schonn duer wann ee fir säin Numm kämpfe muss a fir seng CD'en ze verkafen. Dat ass vill Aarbecht fir eng Band a wa si och nach kämpfe muss fir iwwerhaupt ze prouwen, dat ka jo näischt ginn.

Interview: Claudine Muno

MUSEK

Keng kleng karéiert Chaos-Kanner

"In Defence of Rock" heescht déi zweet Compilatioun vum lëtzebuenger Label Winged Skull. De Rock muss verteidegt ginn, mee géint wat? De Giordano Bruno (24), ee vun de Grenner vum Label, schwätzt iwwert d'Problemer vun der lëtzebuenger Underground Musikszene.

Ween ass Winged Skull?

Winged Skull ass am Dezember 1999 entstan. Et war eng Idee vun dräi Leit, déi an dräi verschiddene Gruppen waren an öfters Concert'en a Café'en gespilt hun. Iergendwann hu mir gemierkt, dass awer verschidde Lait un deem interesséiert waren, wat mir do gezwaft hunn. Emmer méi Bands sinn entstan, emmer méi Lait si komm, emmer méi hu mir probéiert fir weider Concert'en ze organiséieren. Dunn hu mir gemierkt, dass dat ganz emmer méi kascht huet a gläich net méi aus eiser Täsch ze finanzéieren war. Dofir hu mir Winged Skull Booking gegrënnt. Mir hu Sue gesammelt, eng Keess gemaach wouraus dann all Käschtchen déi mir haten bezuelt goufen. Mir waren esou ee kleng Kollektiv vu verschiddene Bands, an dat huet esou gutt geklappt, dass mir och eise Gruppe regelméisseg équilibréiert Gagen konnte ginn. Dunn ass dat esou viru gaang a mir hunn och auslännesch Bands agelueden fir zu Lëtzebuerg ze spillen. Elo si mir op e Punkt komm wou mir bis zu 30-40 Emails den Dag kréien, matt Ufroe vun auslännesche Bands déi hei wëlle spillen.

De Booking ass deen ee Job vu Winged Skull. Dunn am Oktober 2002 hu mir decidéiert och ee Label ze grënnen, deen Winged Skull Records heescht. Winged Skull Records sinn am Moment 8 Gruppen déi sech all gutt kennen a sech autofinanzéieren. Mir sinn zu 4 Lait déi dat ganz finanziell

géréieren, mee d'Sue gehéieren de Gruppen. All Schrëtt wou mir maachen, alles wat mir rausbréngen gëtt mat jidderengem vun all Grupp beschwat an decidéiert an do ass et ebe wichteg wann ee sech gutt versteht ënnerteneen, wat och de Fall ass. Mir 4 Gérent'en probéieren dann deen sougenannte Marketing, d'Verdreiwung am Ausland esou gutt wéi méiglech ze maachen, mir hu wierklech keng grouss Méiglechkeeten, mee esou lues a lues schaffe mir eis erop. Mäi Papp seet emmer op italesch "Chi va piano, va sano ed arriva lontano...", wat an eise Fall esou vill heescht wéi "ween d'Saach lues ugeet, kënnt gesond un a kënnt iergendswéini eng Kéier ganz wäit..." ! Dat ass e bëssen eis Politik bei Winged Skull Records. Mir erweideren eis, dëst Joer hu mir och d'Méiglechkeet fir nach déi eng oder aner zwee Gruppen an d'Famill ze adoptéieren, an do maache mir dann och e Choix ob et an eisen Aan schonn e Wert huet, ob d'Grupp Wëllen huet fir och eppes dofir ze man an op se matt eiser Politik averstaan, mee meeschtens ass déi Rock'n'Roll Mentalitéit bei jidderengem do.

Wat fir eng Philosophie stécht fir iech hannert de Compilatiounen?

De 24. Januar 2003 hate mir schonn eng Compilatioun, déi iwwregens "Tales from the Winged Skull" heescht, erausbruecht. Déi huet sech relativ

gut verkaaf. Déi CD war souzeeso de Start fir eise Label Winged Skull. "In Defence of Rock" hu mir sécher net erausbruecht fir Frick ze man, well mat Musek kann een op eise Niveau ganz schlecht wierklech eppes verdéngen. Et ass einfach fir de Leit hei an och am Ausland ze weisen, dass et och gutt Gruppen zu Lëtzebuerg ginn Mir fannen, dass et an eiser sougenannter Underground Szen wierklech am Moment eng enorm Evoluitioun vun der Qualitéit vun de Bands gëtt, och wann déi Leit nie an engem Conservatoire waren. Dës CD ass och fir d'Ausland geduecht, also mir verschécken all eis CD'en déi mir bis ewell rausbruecht hunn un Fanzines, déi se dann gutt oder och oft net esou gutt kritiséieren. Och wann eis Bands am Ausland spillen, probéieren si d'Compil ze verkafen, wat och eenegermoossen leeft. Desweideren ginn dës CD'en och un auslännesch Gruppe weidergereecht an dann an deene Gruppen hir Distributioun opgeholl, wat natierlech nëmmen vu Virdeel ass fir d'lëtzebuenger Bands, well si doduerch am Ausland promotéiert ginn. An ech mengen den Haaptpunkt vun där Compil ass de Faktor Promotion am In- an Ausland.

Winged Skull steet jo haaptsächlech fir Punkrock ...

Dat wëll net heeschen, dass mir kleng karéiert Chaos-Kanner sinn. Nee, dat si mir net, mir si ganz normal léif sozial,

fir de Friden a sozialkritesch Jongen a Meedercher, déi haaptsächlech Musek wëlle man. Punkrock ass an eisen Aan eng Form vun Expressioun, eng Form vu Spaass, eng Liewensaart déi sech e bësse vun eise sougenannten, richtigen, ugepasste System ënnerscheid. Mir si keng Anarchisten, nee mir si just eng kleng Oppositioun, déi Spaass huet.

Mir als Museker sinn zimlech heftig ënnerdréckt an dem Sënn, dass mir wierklech andauernd kämpfe mussen fir iwwerhaupt kënnen iergendswou an engem Café ze spillen. Mir hunn näischt, och keng Méiglechkeete fir ze prouwen. E Proufsäll, wou näischt dra steet kascht tëscht 300-500 € de Mount. Wouhir solle mir als Studenten, Schüler oder kleng Aarbechter eis dat leeschten kënnen? Mir mussen en plus och nach eis Instrumenter an Anlagen ënnerhalen, wat och net grad bëlle ass. Et ass net einfach, duerfir huele mir Initiative fir de Leit an de Ministären ze weisen, dass et eng Musikszene gëtt jenseits vum kommerzielle Mainstream-Radio. Och hir Kanner an Neveux'en spillen an verschiddene Gruppen, ech si sécher bei där eng oder där anerer Grupp déi op der Compil ass, do ass esou een oder eent dobäi ...

Op wat fir eng Schwierigkeeten stoussst dir konkret als Label?

Et ass schwéier fir finanziell Ennerstëtzung bei de Sponso-

"In Defence of Rock" kann ee fir 4 € beim Label bestellen.

Méi Informatiounen op www.wingedskull.cjb.net